

王季和先生著

夷邛百詠

秀民題眉



自序

戊辰秋九月謁李伯琦先生於吳門因游虎邱虎邱一名海湧山在蘇州城西北七里舊屬元和縣因葬吳王闔閭始得名相傳葬時以扁諸魚腸等劍三千殉焉葬三日金精上揚化爲白虎據墳故名虎邱隋仁壽九年建塔邱上寺院林立而名益著有明復社時斯處最稱繁盛七里山塘笙歌達旦見諸紀載明季之亂燬焉清初稍稍規復再遭洪楊兵燹蕩然無存迄今承平六十年舊觀終不可復矣今最著者只十八景卽山中故老傳說遺蹟亦不過數十處某樓某園某亭某寺欲一一詢當年何在瞠目不能答矣予考各志記所載依陸肇域虎邱志例東起山塘橋西至西郭橋北距長蕩南盡野芳涇得名勝遺蹟二百餘處拈百題各繫一絕並附考注已不存者注今廢不可考者注莫考考古君子或亦不訾焉王政謙自識

虎邱百詠

題詞

虎邱擁翠出天然百首吟成句欲仙勝境自應資筆述高人原不藉詩傳揮毫落紙雲煙似出口成章錦繡鮮又見生公來說法置身如坐講臺前歛縣汪定執

王維千里作吳游不負名山記虎邱百詠詩成傳稿本一時紙貴走星郵瀾稱養鶴仙蹤杳石號蝸牛豔蹟留手把斯篇證往事顧書陸志未堪儔歛縣汪己文

劍氣銷磨霸氣沉今朝我輩復登臨千林楓葉巖巒晚數點梅花天地心成句善畫工詩摩詰句高山流水伯牙琴漫言古調無人愛自有同音能賞音歛縣汪邦鍾

好景盡將詩記錄海藏舊句頌吳儂百篇具有興亡感韻事能兼史氏功

虎邱勝境昔曾經幻跡相逢事窈冥我與山靈應有舊荒巖忽現可中亭己

春予與董曉岑諸君游虎邱劍池上忽見四角危亭中矗石碑高五六尺刻可中亭三字大逾尺急招同遊往觀已杳嗣質諸李伯琦先生先生云古籍

有謂山市者或卽此歟顧藝蘭

海湧奇峰景物稱斯人高詠氣橫秋欲窮幽峻同靈運拚使詩情戀虎邱語唾珠璣羅古跡筆濡烟靄紀清遊綺才不負山靈約千載林巒一覽收同邑

楊開森

九秋風日快清游虎阜山光腕底收巖壑探搜賚古籍壺觴陪侍近名流君游

蘇下榻李伯琦部郎宅部郎導游並出所藏虎邱各志記以資考證漁洋詩派真堪嗣靈運芳踪欲與儔猶記

送行有佳句吟篇狼籍壓歸舟君百詠詩成鄉人爭賂爲快去年李部郎送君歸里詩有扁舟滿載虎邱詩句同邑

趙守廉

燈火笙歌七里塘繁華一夢感金匱劫灰冷落前朝事誰與詩人弔夕陽
蘇臺故實費搜羅太息圖經失載多贏得仲初詩料富冷香閣畔幾吟哦
吳宮花草賸荒邱千載猶傳勝跡留烟寺鐘聲溪舫笛先生都向筆端收
石壁藤蘿護塔尖吟情畫意自相兼憑誰補繪名山景一首新詩一尺縑同
邑女子李家恆

虎邱百詠

MG
I226
513



3 2168 6520 8

虎邱百詠

合肥王政謙季和

斷梁殿

殿在山南有清聖祖路接天閭御書匾額下有元至正七年黃縉明永樂二十二年楊士奇景泰四年周忱正統十年張益所撰記文四碑相傳清高宗南巡時飭造工匠錯配木料限期已迫工人畏罪自裁有異人指點方成故梁中斷而殿不圯實則斷梁下復承以橫木無足異也爲虎邱十八景之一

悠悠山路接天閭御筆留題仰斷梁勒石幾人紀本末黃楊而後又周張
雙梁殿

舊在山南二殿相對爲最初古蹟宋淳熙中有僧凡庸好修造盡毀

虎邱百詠

之

山南有殿峙西東古蹟千年說此中可恨山僧殺風景焚琴烹鶴事相同

伽藍殿

舊在山東明正統十二年建有恆順堂文震孟書匾今廢

嶙峋寶殿號伽藍殿廢空聞燕語喃震孟此中一題額至今佳話在江南

石觀音殿

殿在山西南就本山石鑿成觀音上刻有經典九十二行宋曾公亮

手筆爲虎邱十八景之一

嶺樹重遮一徑深依山鑿石現觀音琳瑯兩壁殘碑在緬想前賢感不禁

千人石

石在山南大可容千人坐因名焉胡宗纘篆書千人坐三字刻石壁

或云闔閭令千人築墓中多秘密墓成恐洩盡殺之故名爲虎邱十八景之一

大石千人坐寺前我來訪古意愀然如何委棄歸榛莽不供媯皇補漏天

點頭石

石在山南白蓮池中又名覺石生公說法時人無信者乃聚石爲徒宣講涅槃經石皆點頭示意云爲虎邱十八景之一

雲影波光靜不流蓮房露冷又深秋涅槃內典無人說頑石於今不點頭

試劍石

石在山南宋呂升卿所題相傳秦皇掘得吳殉劍所闢或云吳王鍊雌雄劍旣成而試之蓋石中分如截取其形似而已爲虎邱十八景之一

來尋勝跡過山塘策蹇巖阿已夕陽巨石中分當路臥荒唐試劍說吳王

蝸牛石

石在山南又名𧈧𧈧石以形似也一說唐六如初遇秋香於此風吹帽落秋香爲之一笑又名枕石謂生公會倚此看經今土人有孕者遙擲碎石於其上以下男女中則爲男墜則爲女爲虎邱十八景之

一

滿山怪石列星棊雅癖米癩更有誰獨此蝸牛炙人口前朝豔蹟費猜疑

走砌石

石在山徑有趨走之勢見李翱南來錄今莫考

試劍蝸牛臥野蒿又傳走砌在寒皋滿山亂石今難辨記異空傳有李翱

二仙亭

亭在山南相傳呂純陽陳搏曾對奕於此今建石亭中刻二仙像爲
虎邱十八景之一

小立亭前拜二仙呂陳道貌仰飄然山中父老談遺事勝跡曾因一局傳
御碑亭

亭在山頂刻聖祖高宗遊虎邱詩聖祖一碑高宗二碑昔分立三亭
今併爲一亭

杉松交蔽綠陰滋一角荒亭蠹古碑獨下疲驢來展讀仁皇高廟紀遊詩
可中亭

舊在山南相傳因劉禹錫一方明月可中亭句故名茹志謂當作可
月亭廣輿記生公於石上講經劉宋文帝大會僧衆施食人謂僧律
日過中卽不食帝曰始可中耳生公曰日麗天天言中何得非中卽

舉箸而食顧湄曰可中是日非月并以劉禹錫詩爲誤任兆麟曰此詩家有活用法實則可中可月俱無不可可中之名已見元甘均詩中愚謂亭乃在講經處因生公之言而名亭於劉詩無涉今廢

麗天白日生公語非月可中顧氏詞可月可中無不可不須附會說劉詩

海晏亭

舊在山南順治己亥明延平王鄭成功以舟師由閩海內伐連戰皆捷直薄金陵中原大震提督梁紀鳳大敗之蘇人爲建此亭以紀功吳梅村爲之銘今廢

戰敗鯨鯢水氣腥紀功勒石建斯亭而今亭圯遺聞杳弔古誰知祭酒銘

花雨亭

亭在山南取方子通生公天人師說法花雨墮意今廢

昔日生公此說法妙香拂鼻墮天花卽今人去荒亭廢惟有寒林噪暮鴉

草草亭

舊在便山橋旁今廢爲黃濤楫著書處濤楫字逢源一字寬夫又字蓬園吳邑諸生文筆工秀書法歐陽率更乾隆時舉博學鴻詞不赴草草亭荒夕照虛橋頭猶說逸人居年年綠遍王孫草更有何人此著書

講經臺

臺在山南一名說法臺晉道生講經處唐李陽冰篆書生公講臺四字刻石壁或云蔡襄書爲虎邱十八景之一按道生姓魏鉅鹿人幼從竺法汰出家年十五卽登講臺初入廬山幽棲七年後遊長安從羅什受業因講經忤衆僧被擯南還止虎邱聚石爲徒講涅槃經至闡提處則說有佛性且曰如我所說契佛心否羣石皆爲點頭旬日

學衆雲集旣而復投廬山元嘉十一年十一月升座說法將畢隱几而化

臺號講經斷澗東雨花妙諦憶生公一時頑石頭能點靈異方知象教崇

琴臺

臺在山西晉王珣字元琳丞相導之孫父洽吳國內史珣學涉通敏文高當世大司馬桓溫辟爲主簿至重之曰王掾必爲黑頭公未易才也從討袁眞封交趾望海縣東亭侯太元中任吳國內史在郡爲士庶所悅累遷尙書左僕射領選進尙書令加散騎常侍太元十五年卒贈司徒諡獻穆珣捨別墅爲虎邱寺今浮圖七級卽其琴臺故址寺前有杉樹一株珣手所植宋時尙存吳梅村王珣故宅詩有卽今誰令桓公喜正是山花欲笑時句

捨宅風流東晉年王郎遺事至今傳
當時手植杉何在惟有山花紅欲然
梳妝臺

臺在山西俗傳今塔基爲西施之梳妝臺

欲尋遺跡問西施昔日臺荒塔影移
風過禪堂檐鐸響恍聞玉珮想手姿
翻經臺

舊在山西晉梵僧於此重譯法華經今莫考

經典重翻志偉哉翻經曾此築層臺
經成佛子今何去惟有天風吹去來
羅漢臺

舊在山西晉有羅漢在此受戒今莫考

受戒曾聞別築臺佛門遺蹟在山隈
而今莫問當年事已似胡僧話劫灰
望蘇臺

臺在山西築屋於石壁之上今日小吳軒仍其舊名也爲虎邱十八景之一

路曲林深景更幽望蘇臺上小勾留倚闌忽觸懷人感舊約空存有淚流

去年寄子淵有會當策蹇蘇臺畔願乞膺東作比鄰之句今我來遊子淵久沒能不潸然

讀書臺

臺在山北宋尹焞讀書處焞字彥明洛人師事程叔子應舉發策議誅元祐黨人焞曰尙可求仕乎不對而出靖康元年以薦至京再謝還山賜號和靖處士金人陷洛闔門被害焞死而蘇劉豫以禮聘焞不從紹興五年召爲崇政殿說書累除猷閣待制焞曰病不能朝矣而寵祿日至雖主上賢我我何功德當之辭不已九年二月遂奉外祠貧不能歸去之平江虎邱寓居西庵十年七十曰七十而老

尚矣乞致仕許之十二月如紹興居二年而歿著有論語解和靖集
丹詔蒲輪下九天山林泉石訪遺賢一身貧寄西庵裏黃卷青鐙忽十年

劍池

池在山南兩崖劃開中涵石泉深不可測志云秦始皇鑿以求珍異
莫知所在吳大帝穿之亦無所得其鑿處遂成深池李秀卿品爲天
下第五泉壁間刻唐顏真卿書虎邱劍池四字虎邱二字久失葉清
臣樞摹補鐫又石壁刻風壑雲泉四字米芾書爲虎邱十八景之一
澗水深深石壁雄松枝倒挂蓼花紅虬奔虺走摩崖字遺蹟猶傳顏魯公

白蓮池

池在山南有周百三十步生公說法時值嚴冬而池生千葉蓮花潔
白如雪爲虎邱十八景之一

隆冬說法頓生春，千葉蓮花白似銀。此日枯荷欹淺水，開花說法更無人。

生公池

舊在山西生公到，日水驟盈生公去。水忽涸，又名生公放生池。今湮。

生公到日水漣漪，公去清泉何處移。滿目荒烟繁蔓草，放生難問舊時池。

洗盃池

舊在山西相傳羅漢翻經時，洗盃於此。今湮。

洗盃朝朝水一灣，而今不復見潺湲。亦知羅漢有深意，法水難留在世間。

萬歲樓

舊在山西卽悟石軒舊址。康熙二十七年郡民建，中奉聖祖蠲免江。

蘇錢糧恩旨御碑。今廢。尤侗萬歲樓落成詩云：闔闔天高紫色浮蒼。

龍鳳駕下蘇州春風初遶千人石。曉日羣瞻萬歲樓。漢詔蠲租追地。

節唐碑頌德勝之果吾皇遊豫民歌舞此地從今號帝邱侗字同人
一字展成號西堂一號梅庵又號艮齋

蠲租免稅聖恩滋萬歲樓藏諭旨碑勝地有名終不改帝邱空見展成詩

諫草樓

舊在 山南姜忠肅祠旁姜實節所構爲其父貞毅先生塚之影堂東
有敬思居改過軒巾箱閣爲實節讀書處今均廢

五更拜疏上丹墀廷杖橫加命似絲勝地築樓藏諫草名臣畢竟有佳兒

梅花樓

舊在 山東元梅花道人吳仲圭嘗居此文衡山畫梅於壁得名今廢

梅花道士住樓頭更有衡山畫筆留今日寒梅欲破蕊荒山不見舊時樓

陳公樓

舊在山頂今廢初寺僧取水劍池登降甚勞宋隆興二年陳敷文出錢二十萬臨劍崖建樓以便取汲即今雙吊井遺址

千年駒影去如風歷劫蟲沙往事空一片寒煙與衰草危樓何處問陳公

陸羽樓

舊在山北今廢

山含烟靄淡如無萬木森森鳥自呼品水高人曾駐此井枯樓亦付荒蕪

虞印樓

舊在山東北窗正對虞山因題虞印今廢

未遂南沙汗漫遊

虞山在常熟南沙常熟古名

此間風景冠蘇州劍門拂水稱奇境

劍門拂水

寺皆虞山勝境

欲望今無虞印樓

翠微樓

舊在山旁今莫考
明吳子孝有虎邱翠微樓詩
山中試聽鳥啼新
借問韶光已半春
詩句醉題巖石上
詫他城市未遊人

山中依舊鳥聲新
不見題詩石上人
今我來遊自城市
當年子孝浪相瞋

空谷樓

舊在東岡又名空谷山房
明萬曆時紫柏大師建爲其師養老地
崇禎九年僧子振重建
今莫考

尊師養老意何優
小築山房東陌頭
紫柏久亡子振杳
而今空谷已無樓

魁星閣

舊在山東清順治二年
毘陵劉倬嘗寓此讀書
魁星見後成進士
遂肖像祀之
今莫考

深山人靜苦窮經
刺股懸梁夜照螢
他日登瀛已朕兆
舉頭恍忽見魁星

藏經閣

舊在山西明英宗正統十二年頒賜虎邱寺藏經一部有敕侍郎周忱賚經至知府宋勝建閣藏焉今廢

當年寶籙賜天廷千里南來護百靈勝地幾回桑海變我來無閣看藏經

冷香閣

閣在山西周植紅綠梅花爲近年吳蔭培探花諸人所建

冷香閣上夕陽遲萬樹枯梅瘦影欹聞說三春花似錦我來恨未及花時

致爽閣

舊在山西文徵明書額康熙四十五年移入行宮聖祖御書曠宜樓匾橫今廢

高閣玲瓏名致爽南巡駐蹕作行宮宸題匾額今何在付與斜陽蔓草中

御書閣

舊在山旁藏宋眞宗御書三百卷久毀明永樂年建萬仙閣於上又名妙莊嚴閣亦毀

傑閣崔巍聳翠巒眞宗宸翰重齊紈御碑亭破秋風冷先後興亡一例看

清聖祖高宗御碑亭

採蓮橋

橋在山南今廢王世貞採蓮橋詩云曉風零落滴瑤華游女爭攀似

若耶若問什公應有解淤泥元自出蓮花

荷蓋亭亭宿雨晴潺潺流水小橋橫蓮花元自淤泥出妙諦曾聞王世貞

淨土橋

橋在山南由千人石至五十三參之橋

夕陽欲下步遲遲山外風來水葦漪此處莊嚴本佛地橋名淨土不須疑

塔影橋

橋在山西橋上可見塔影入水之景

日下空山塔影東層層倒影入波中西湖十景遙相憶夕照雷峯景正同夕陽西下雷峯塔倒影湖中名雷峯夕照爲西湖十景之一

愁愁泉

泉在山西南梁天監中饒饒尊者由寶華山來虎邱泉隨湧出今愁愁泉其遺跡也宋呂升卿題愁愁泉三字刻石爲虎邱十八景之一六朝遺跡已千年愁愁泉臨古道邊尊者不來秋又老一林烏桕鎖寒烟

虎跑泉

舊在山西北梁僧惠響居虎邱不得甘泉乃俯地側聽云此有泉遂鑿

石得井泉源三丈虎爲跑因名虎跑泉今湮

欲披荒草問寒泉惠響遺蹤歎杳然聞說西湖有虎跑杭州西湖亦有虎跑至今依舊

滴涓涓

煉丹井

舊在山南唐清遠道士煉丹處今湮

宿雨初收澗水奔巾車遙指古山門煉丹道士曾穿井李子謂伯琦先生殷殷爲

我論

陸羽井

井在山東口方丈旁石壁上鐫第三泉二字泉味甘冽終年不涸陸

羽所品定者爲虎邱十八景之一

筆走龍蛇石壁崇摩挲弔古意無窮第三泉味真清冽品水會傳桑苧翁

五十三參

在山南由千人石登雲岩寺石階五十三級名五十三參取佛經五十三參參見佛之意爲虎邱十八景之一

千人石過小停驂躡級崔巍五十三行到雲岩一回首山光如黛水拖藍

養鶴澗

澗在山南相傳唐清遠道士養鶴於此

仙人遺跡傳清遠九轉丹成馭碧空

旁有清遠陳丹井

澗水依然流日夜不聞雲鶴

唳秋風

正修講院

院在斟酌橋西崇禎十六年吳縣知縣牛若麟建祀先賢周程諸子後爲學舍若麟去任吳民爲建生祠徐沂撰去思碑巡撫馬祐改名

正心書院順治初陸履常孝廉坦賣卜於此今廢陳三島偕松之過
履常卜肆詩云孝廉能大隱旅次一僧寮卜效君平肆詩吟斟酌橋
松花沾野服榆莢灑空飄風雨何人至同過話寂寥

曾傳講院祀周程得建生祠吏亦榮我欲客途問休咎而今無處訪君平

鐵華庵

舊在山東明萬曆初紫柏禪師居此有鐵佛又號鐵佛院今廢

秋山潭影空人心紫柏遺蹤不可尋鐵佛無存禪院廢隔牆惟有石觀音

址與石觀音殿相近

湧泉庵

舊在新塘橋北初建時有泉湧出故名內有月滿樓清足堂翠竹軒
今廢清初徐崧題庵詩云砌石山根似停泓水一方游魚穿樹影落

葉點天光岸盡烟籠壁池深月映廊倚闌塵世隔不覺沁清涼

泉涸庵頽春復秋題詩人去思悠悠雲霄尙有當年月一樣清輝照滿樓

靜觀齋

舊在江北宋古田禪師構堂於此名千頃雲閣清聖祖南巡移入行

宮御題靜觀齋今廢

行宮昔日傍山隈聖祖宸題玉榜開斷瓦頽垣縈蔓草白雲依舊上荒臺

陳公祠

舊在山南祀明兵部尙書巡按直隸御史陳瑞瑞字孔麟長皋人嘉

靖四十三年撫吳值歲饑疏請折漕賑貸吳人感之詣闕留一年去

爲建生祠今廢

吳民失歲苦流離拜疏楓宸請賑飢我羨長皋陳御史報恩崇德有生祠

汪太史祠

舊在山南祀清翰林院編修汪琬琬字茗文號鈍庵別號堯峯長洲人累官郎中工古文辭著有堯峰集今廢

昔年曾讀堯峰集子固歐陽或儼之一自洪楊浩劫後荒山無處訪遺祠

二姜先生祠

舊在山南祀明萊陽姜埰及弟垓埰字如農禮科給事中劾周延儒下獄幾死國變後自號宣州老兵又號敬亭山人客死吳中私諡貞毅弟垓字如須官行人埰在獄得垓營護不死及其父忠肅公殉難疏請代兄繫獄俾兄奔喪不許國變後卒私諡真文康熙二十四年巡撫湯斌爲建祠今廢

批鱗上疏左光斗繫獄代兄蘇子由忠義一門光史册弟昆父子各千秋

姜忠肅公祠

舊在 山南爲姜採之父諱瀉里明諸生崇禎十六年萊陽城破不屈
死贈光祿寺卿諡忠肅康熙三十四年巡撫宋犖爲建祠今廢

中原浩劫歎沙蟲羽檄飛馳烽火紅誓與危城共存沒張巡奇節古今同

四賢祠

舊在 山南祀明夏忠靖公原吉周文襄公忱王端毅公恕海忠介公
瑞今廢

白蓮池畔尋遺址昔日曾聞祀四賢廟貌縱隨秋草沒干霄正氣自千年

湯文正祠

舊在 山東祀清巡撫御史湯斌斌睢州人字孔伯號潛庵卒諡文正
巡撫陳大受撰文正祠碑云初吳民欲生祀公公拒甚力旣而建祠

於府學年久就頽乾隆九年因虎邱舊祠改建以祀公今廢
生祀吳民報德殷崇祠又建此山垠兩祠今日都頽廢述往惟餘大受文

尹肅公祠

舊在山西祀宋和靖先生尹焞嘉定七年士人黃士毅請於知府陳
芾所建今廢

山右當年廟貌崇吳人景慕意優隆西湖亦有林和靖清節高風兩地同

三賢祠

舊在山西祀宋范仲淹胡瑗尹焞明嘉靖間建今廢

仲淹正氣垂今古經術胡瑗後世傳更有高人尹處士一龕合祀號三賢

李公祠

祠在山西南祀清太傅大學士一等侯諡文忠合肥李鴻章

祠宇高寒萬木森宸題御筆重圭琛三吳戰伐空陳迹回首前朝感不禁

常王祠

舊在山旁祀明開平忠武王常遇春王平張氏駐兵寺中得免兵禍
僧德之爲王建祠今廢

崇祠報德在山陽異姓開平忠武王興廢愍愍如轉轂淒涼豈獨大功坊

陳恪勤公祠

祠在擁翠山莊後靈瀾精舍東耳房祀清河道總督謚恪勤陳鵬年
鵬年字北溟湘潭人曾官江蘇巡撫有惠政人呼爲陳青天祠在黃
天蕩人有疾病祈禱有效因分祀於此並塑像焉香火之盛過於黃
天蕩祠

中丞遺愛繫人思分祀名山事亦宜女士傾城爭禱拜漫因祈疾說淫祠

鴛鴦壙

壙在山南明長洲倪士義被誣死妻楊氏爲夫營壙鑿鴛鴦二字於石鄉人諷其改醮婦遽自刎以明志後人義之併葬於此爲虎邱十八景之一

吳中烈婦昔傳楊白刃膏身事可傷名與青山同不朽千秋遺壙號鴛鴦
真娘墓

墓在山東南真娘三國時人姓胡爲吳名妓父爲官清廉被奸徒陷害死真娘弱質無依身陷平康冰心貞操無異閨秀客至作長談而已一日有客至堅請留宿真娘許以來日客翌日復至而真娘已投環自盡矣客哀之爲築墓於此爲虎邱十八景之一

一坏荒土虎邱旁豔蹟東吳事渺茫我讀遺碑剔苔蘚寒烟衰草弔真娘

五人墓

墓在山塘明天啟七年周忠介公順昌觸怒魏闖被逮時五人憤擊
內瑋巡撫毛一鷺爲魏私人以吳民亂請於朝誅此五人五人者顏
佩韋楊念如馬杰沈揚周文元士大夫捐金斂葬於此吳默題曰五
人之墓

緹騎無端逮直臣五人憤擊共成仁卽今崇冢山塘曲過客頻經薦藻蘋

闖閭墓

吳王闖閭墓以扁諸魚腸等劍三千殉葬焉復以金銀爲坑水銀爲
池葬三日精氣上揚化爲虎故名虎邱

此是吳王埋骨處三千寶劍水銀溝金精化虎踞墳上贏得而今號虎邱

眞姬墓

墓在山西北二里俗訛爲金姬墩姬姓李名金兒章邱人父業卜獨
生此女女通經史仙佛百家書并曉習父術元末爲張士誠所掠侍
太妃曹氏言軍事屢中士誠敬愛之曹氏遇之厚姬亦謹身士誠不
得犯既請曹冊爲妃辭曹出中庭拜跪閉目化去衆咸駭異士誠惋
惜命葬以金寶殉焉後士誠妻劉氏夢姬來泣曰國家舉事大錯難
爲計矣脫有不測二子吾陰護之既難急劉招姬父母付以二子匿
民舍事定走章邱冒姓李焉

故鄉烽火感流離博學終難救命奇贏得名山埋玉骨真娘而後又真姬

莫格冢

莫格古賢人避世者居於此卒葬虎邱見越絕書今莫考

上古賢人稱莫格遺榮避世此中居高蹤佚事難稽考名姓曾留越絕書

葛賢墓

葛賢初名成萬曆二十九年內監孫某催稅於蘇勢張成以蒲扇招市人共擊殺闖黨士人焚其家四府稅錢遂止吳人義之呼爲葛將軍郡守改其名曰賢繁獄十年得釋廬五人墓側卒遂葬焉文震孟題其碣曰有吳葛賢之墓

有明稗政亂如絲太息三吳民命危一擊萬家齊拜賜死猶穿冢近要離

三姬冢

黔孝廉高梁楹客死吳下有敖姬十二娘年十八相繼死太史陳仁錫爲葬虎邱下又通判某二姬不能歸葬并合葬之爲之銘時萬曆四十年也今莫考

異地飄零薄命同故鄉回首夢難通一坏黃土埋幽骨高義人稱太史公

沈媛墓

沈媛明季人字黃宇庚年十九未嫁夫死矢志不嫁獨居一樓三十年明亡遂絕粒死葬虎邱下今莫考

生小深閨十九秋守眞矢志世無儔卅年冰雪松筠節占得名山土一邱

吳女墳

闔閭女曰幻玉王與夫人及女會食蒸魚王前嘗半而與女女怒曰王食魚辱我乃自殺闔閭痛之爲葬虎邱下葬時舞白鶴於市令民隨觀男女與鶴俱入羨門因發機掩之又取土時其地遂成湖號女墳湖今莫考一說夫差女幻玉願與韓重爲偶不果結怨而死陸龜蒙皮日休高啓詠女墳湖詩均用韓重事圖經續記云幻玉沒後化形歌曰南山有鳥北山張羅鳥旣高飛羅當奈何志願從君讒言孔

多悲怨成疾沒身黃陂

南山有鳥北山羅黃土無情喚奈何昨夜枝頭鵲泣血也疑幻玉化形歌

顧襄墓

襄字公甫宋太學上舍生登熙寧九年第名聲籍甚沒葬虎邱今莫考

曾探故籍仰遺聞今日名山訪此墳欲覓斷碑無覓處荒邱累累孰爲君

黃居簡墓

居簡字元易號東浦建安人工詩嘉熙中卒通判翁逢龍葬之虎邱今莫考

嘉熙才子黃居簡儒雅能文不可攀一代風流今已歇荒墳何處訪空山

幽獨君墓

唐大歷十三年虎邱寺有二鬼題詩一自稱幽獨君一答幽獨君幽獨君詩云青松多悲風蕭蕭聲日哀南山接北山幽壘空崔嵬白日空昭昭不照長夜臺雖知生者樂魂魄安能回況復念所親痛哭心肝摧痛哭復何言哀哉復哀哉答詩云神仙不可學形化空遊魂白日非我朝青松爲我門雖復隔幽壘猶知念子孫何以遠悲怨萬物總歸根寄言世上人莫厭臨芳罇莊生問枯骨至樂成虛言觀察使李道昌奏聞勅令致祭數日又題一首云幽冥雖異路平昔忝攻文欲知潛寐處山北兩孤墳李道昌有祭幽獨君文皮日休陸龜蒙均有追和幽獨君詩墳今莫考

自號何人幽獨君題詩曾說忝攻文蕭蕭依舊悲風起叢莽難尋山北墳
徐蘭墓

宋淳祐間吳中名妓徐蘭卒葬此邊雲遇爲誌今莫考

三吳名妓有徐蘭宛轉歌喉珠走盤欲與真娘爭勝地故將玉骨葬青巒

呂浩叟墓

宋呂浩叟逸其字使元軍見張宏範抗詞不屈宋亡授淮東宣慰使
不就隱虎邱構壽樂堂卒葬其地

胡馬南來王氣終孤臣淚灑杜鵑紅離離秋草荒墳遍更有何人弔呂公

悟石軒

舊在山西因生公說法頑石亦悟也又名得泉樓今廢

潏潏澗水流今古頑石依然池上留欲問斯軒何處是斷煙衰草不勝愁

月駕軒

軒在山西南壁間刻錢大昕書海湧峯三字如斗劉肇基月駕軒詩

絕頂高窗俯衆山，看雲飛去又飛還。
我來倚醉雙松下，還是雲閒是客閒。

慣攜雙屐訪名山，百里春申一日還。
羨煞劉公客閒句，馳驅我媿白雲閒。

抱甕軒

軒在山西南爲洪文卿殿撰舊建，鄭叔問中翰居此，命名地雖不廣而幽雅，宜人近加修葺，供人遊憩。

小閣猶稱抱甕軒，遠峰如黛正當門。
狀元構造中書住，博得名山韻事存。

雪浪軒

舊在山西南，明人范允臨書額，下臨劍池，坐對悟石軒，今廢。

誅茅構屋在山巔，下瞰深池百尺泉。
題額曾聞有范子，前賢名筆至今傳。

稚兒塔

舊在山東今莫考晉道生法師有誦法華經童子死葬此後商人謝
本夜泊此岸聞誦經聲跡之見其墳上生青蓮花郡守以聞詔建是
塔號法華院宋紹興間重修夜聞塔中誦經聲

內典能耽在弱齡空山風雨感精靈我來何處尋遺塔不聽秋墳鬼誦經

虎邱塔

塔在山巔隋仁壽九年建相傳建塔時掘得古甌函內有銀合盛舍
利一粒取置水甌內旋繞呈祥雲塔成仍置其巔洪楊劫後塔外檐
欄皆燬不可登矣

步出雲岩興更悠山光樹影鳥聲柔千尋古塔凌空立知是隋家勝跡留

勾踐洞

洞在五十三參上俗傳夫差囚勾踐於此又名仙人洞相傳瀆道光

中有鄉民陸某賣花爲業晨擔花入洞中暮出擔空時載四川物鄉人異之一日躡其後入洞二三里深暗不敢進俟諸洞口日暮陸果出手持川菜窮詰之不答旋不知所往洞亦閉塞爲虎邱十八景之一

穿崖疊石傍雲岑古洞沉沉萬木森聞說越王囚此處千秋附會到如今

塔影園

明文基聖建別墅於山南名塔影園後歸顧苓改名雲陽草堂中有松風寢照懷亭修竹山房諸勝清蔣重光有別墅在山東亦名塔影園中有寶月廊香草廬浮蒼閣隨鷗亭諸勝今均廢

照懷亭圯遺風杳寶月廊荒廢址存文蔣二公爭塔影山南山左兩名園

乞花場

虎邱百詠

舊在山南汪鈍翁別業今廢鈍翁有乞花場雜詠詩紅橋朱塔夾溪
山小立斜陽未擬還等是暮年開七秩時流應讓此翁閒

虎阜秋高叫子規數株衰柳晚烟垂紅橋朱塔溪山好風景空傳鈍叟詩
靖園

園在山東爲李文忠祠園亭館玲瓏泉石清幽奇葩異卉甚多中有
日本六角楓五色櫻花尤爲中土所罕覩

名園卜築虎邱陽荷沿風清水閣涼五色櫻花楓六角奇葩移植自扶桑

金粟山房

舊在山下莫考蘇州府志虎邱金粟山房舊產茶極佳烹之色白如
玉香味如蘭而不耐久宋人呼爲白雲茶明萬曆年寺僧苦大吏需
索薙除殆盡

雨前異茗摘新芽，胥吏追呼僧怨嗟。
薤盡眞成大解脫，令人腸斷白雲茶。

玉蘭山房

舊在山下有玉蘭，一株宋時朱劭自閩移植。顧湄志云：明天啓初爲大風所摧，今孫枝復高三尋矣。宋牧仲沈歸愚均有詠玉蘭詩。今山房已廢，玉蘭亦無。

花石成綱，宋社蕪佞臣，誤國可勝誅。移花亦說爲朱劭，今日孫枝歎已無。

西溪別墅

舊在山塘陸龜蒙祠旁。乾隆時龜蒙後人肇域築因龜蒙別墅，中八景，仿爲之。有清風亭、桂子軒、鬥鴨池、菊畦、竹堤、環翠閣、四美樓。諸勝今廢。

清風亭圯，清風冷。桂子軒頽，桂子黃。更有方池，名鬥鴨，依稀景物憶吾鄉。吾

肥城東亦有門鴨池爲魏武帝藏舟塢

含暉山館

舊在 山南聖祖行宮今廢

日長山館靜含暉獅嶺靈巖拱紫薇一自鼎湖龍去後祇今惟有白雲飛

郡厲壇

舊在 山南祀莫敖之鬼明太祖勅建清末始廢

郡厲壇成高復高香煙繚繞語聲嘈吳人佞鬼真堪信又見荒郊祀莫敖

鐵華巖

巖在 山南取東坡鐵華秀巖壁句意

逶迤山道夾松杉指點遙峯落日銜雒誦東坡遺句好千秋名勝鐵華巖

邱南小隱

舊在山南汪琬讀書別業有圓石光潤可鑿故名二十四石圃其勝處有乞花場山光塔影樓今廢

鈍叟遺風不可求邱南佳句至今留當年勝蹟猶堪憶塔影山光共一樓

釣月磯

磯在山南白蓮池邊

釣月千年勝蹟留垂綸我亦坐磯頭一池秋水清如此不見嫦娥來上鉤

擁翠山莊

在冷香閣前爲洪文卿殿撰所建門前石刻龍虎豹熊四大字甚雄壯爲虎邱十八景之一

狀元小築在山西松竹成陰月影低近水遠峰列几席此間風景最難躋
平遠堂

舊在山北後改爲五賢祠唐劉禹錫白居易韋應物宋王禹偁蘇

軾今亦廢

日落空山叫杜鵑連天衰草起寒烟虛堂無處尋平遠更有何人祀五賢

奉萱居

舊在寺旁釋超源奉母所居今廢超源奉萱居詩云歎息復歎息我
母無兒并無食憶昔同胞八弟兄七死一僧不得力朝悽悽暮感感
流水行雲徒飲泣至哉陳睦州草履不辭織菽水晨昏聊自承父氏
宗嗣終斷絕奉萱居愁何如

夜誦華嚴叩木魚禪堂小築奉萱居袈裟權當萊衣舞歎息詩成淚滿裾

東山廟西山廟

東山廟卽古短簿祠在山麓東南祀晉司徒東亭侯王珣珣捨別業

爲寺故祀之西山廟在山麓西南祀王珣弟司空王珉珉字秀琰少
有儁才風情秀發文辭富贍善行書與兄珣並有名聲出珣右時人
爲之語曰法護非不佳僧彌難爲兄法護珣小字僧彌珉小字也珉
累官侍中兼中書令卒贈太常著有論語說

僧彌法護吾宗彥陸氏機雲或可躋佳話競傳能捨宅弟兄分據廟東西

遊虎邱

吳市猶龍別署

李白琦

輕舟卓午泛山塘
秋盡江南木葉黃
高阜昔年騰虎氣
重泉終古葬魚腸
鍊丹台圯心蹤杳
香岫廬空塔影長
莫向寒山問興廢
御碑亭外月如霜

家瑞錄寄

版權
所有

中華民國十九年一月初版

(定價大洋壹角)

著作 王季和


鑒定 李伯琦

校勘 王昺三

發行 汪己文

印刷 毛上珍

蘇州臨頓路



KBC
G
226
13

◀ 號六九〇一話電 ● 口門角西街大前觀州蘇址地 ▶